

**KOMORA MEDICINSKIH-SESTARA-TEHNIČARA  
ZENIČKO-DOBOJSKOG KANTONA**

**PRAVILNIK  
O SADRŽAJU I IZGLEDU REGISTRA LICENCIRANIH ČLANOVA  
KOMORE MEDICINSKIH SESTARA-TEHNIČARA ZENIČKO-DOBOJSKOG  
KANTONA**

Zenica, 11.09. 2020.godine

Na osnovu člana 38. Statuta Komore medicinskih sestara-tehničara Zeničko-dobojskog kantona, Skupština Komore medicinskih sestara-tehničara Zeničko-dobojskog kantona, na sjednici održanoj dana 11.09. 2020. godine donijela je

## **PRAVILNIK**

### **O SADRŽAJU I IZGLEDU REGISTRA LICENCIIRANIH ČLANOVA KOMORE MEDICINSKIH SESTARA-TEHNIČARA ZENIČKO-DOBOJSKOG KANTONA**

#### **I OPĆE ODREDBE**

##### **Član 1.**

Pravilnikom se propisuje sadržaj i izgled registra, te uređuje postupak upisa i vođenja registra medicinskih sestara-tehničara svih nivoa obrazovanja, članova Komore medicinskih sestara-tehničara Zeničko-dobojskog kantona.

Ovim Pravilnikom propisuje se i izdavanje izvadaka i potvrda, na osnovu evidencija koje se vode u registru članova Komore medicinskih sestara-tehničara Zeničko-dobojskog kantona.

##### **Član 2.**

Postupanje po ovom Pravilniku je obaveza Komore medicinskih sestara-tehničara Zeničko-dobojskog kantona.

##### **Član 3.**

Komora medicinskih sestara-tehničara Zeničko-dobojskog kantona vodi registar medicinskih sestara-tehničara svih nivoa obrazovanja te druge upisnike i evidencije, koji predstavljaju javne knjige.

Na osnovu evidencije iz stava 1. ovog člana Komora medicinskih sestara-tehničara Zeničko-dobojskog kantona izdaje i izvatke i potvrde, koje predstavljaju javne isprave.

Komora medicinskih sestara-tehničara Zeničko-dobojskog kantona, kao kontrolor podataka evidencije iz stava 1. ovog člana, saglasno Zakonu o zaštiti ličnih podataka (Službeni glasnik BiH broj 49/06, 76/11 i 89/11) štite privatnost svojih članova.

#### **II IZGLED I SADRŽAJ REGISTRA**

##### **Član 4.**

Komora medicinskih sestara-tehničara Zeničko-dobojskog kantona vodi jedinstven registar članova svih Općinskih povjereništava koji se osnivaju u svakoj općini Zeničko-dobojskog kantona i Gradu Zenici.

Registar iz stava 1. ovog člana ima i elektronsku formu, a oblik i sadržaj registra utvrđen je na obrascu koji čini Prilog ovog Pravilnika.

#### **Član 5.**

Registar medicinskih sestara-tehničara Zeničko-dobojskog kantona sadrži podatke o medicinskim sestrama-tehničarima – članovima komore i komora ih prikuplja i evidentira u skladu sa Zakonom, Statutom, i ovim Pravilnikom.

#### **Član 6.**

U Registar medicinskih sestara-tehničara Zeničko-dobojskog kantona upisuju se slijedeći podaci:

##### **I) OSNOVNI PODACI**

- 1) registarski broj medicinske sestre-tehničara;
- 2) ime i prezime;
- 3) djevojačko prezime;
- 4) ime oca i majke;
- 5) datum i mjesto rođenja;
- 6) državljanstvo;
- 7) adresa prebivališta;
- 8) kontakt telefon i e-mail adresa;

##### **II) STRUČNI PODACI**

- 1) diploma fakulteta zdravstvenih studija, visoke zdravstvene škole, više ili srednje medicinske škole općeg smjera, pedijatrijskog i psihogerijatrijskog smjera, odnosno primaljstva u Bosni i Hercegovini ili nostrificirana diploma stečena u inozemstvu suglasno propisima iz oblasti obrazovanja,
- 2) datum i mjesto polaganja specijalističkog ispita, oblast specijalizacije i broj uvjerenja o položenom specijalističkom ispitu;
- 3) datum i mjesto polaganja stručnog ispita i broj uvjerenja o položenom stručnom ispitu;
- 5) naziv i sjedište ustanove u kojoj radi;
- 6) datum upisa / ispisa iz registra;
- 7) godina sticanja stručnih, naučnih i naučno-nastavnih zvanja;
- 8) podaci o privatnoj / dopunskoj djelatnosti;
- 9) podaci o izdatim licencama (evidentira se broj i datum izdate licence te rok važenja iste);

- 10) podaci o statusu člana (zaposlen, nezaposlen, penzioner, napustio, preminuo);
- 11) napomene (unose se činjenice koje su od značaja);
- 12) podaci o pravosnažnim odlukama Suda komore (unose se podaci o eventualnim postupcima, kao i odlukama Suda komore);

### **III) PODACI O STRUČNOM USAVRŠAVANJU**

1) podaci o aktivnostima (evidentiraju se podaci o stručnom usavršavanju medicinskih sestara-tehničara, u skladu sa posebnim podzakonskim aktom koji donosi federalni ministar na osnovu posebnih propisa o zdravstvenoj zaštiti).

### **III POSTUPAK UPISA U REGISTAR**

#### **Član 7.**

Medicinska sestra-tehničar, nakon položenog stručnog ispita, u roku od 60 dana podnosi zahtjev nadležnoj Komori za upis u Registar medicinskih sestara tehničara Zeničko-dobojskog kantona, u skladu sa Zakonom o sestrinstvu i primaljstvu FBiH, Statutom i Pravilnikom o postupku izdavanja licence, kao i sadržaju i izgledu licence.

Zahtjev iz stava 1. ovog člana podnosi se na obrascu koji čini Prilog II ovog Pravilnika.

Uz zahtjev, iz stava 1. ovog člana, medicinska sestra-tehničar Zeničko-dobojskog kantona je obavezan dostaviti Evidencijski list te dokumentaciju utvrđenu Pravilnikom o postupku izdavanja licence, kao i sadržaju i izgledu licence, Statutom i Zakonom o sestrinstvu i primaljstvu FBiH.

#### **Član 8.**

Postupak razmatranja zahtjeva za upis u Registar medicinskih sestara-tehničara Zeničko-dobojskog kantona, Komora provodi na način utvrđen Pravilnikom o postupku izdavanja licence, kao i sadržaju i izgledu licence te Statutom Komore medicinskih sestara-tehničara Zeničko-dobojskog kantona.

Nakon provedenog postupka Komisija za izdavanje, obnavljanje i oduzimanje odobrenja – licence za samostalan rad Zeničko-dobojskog kantona, donosi odluku o izdavanju, obnavljanju ili oduzimanje odobrenja – licence za samostalan rad. Na osnovu Odluke Komisije, Predsjednik Komore izdaje odobrenje za samostalan rad-licencu ili donosi rješenje o odbijanju zahtjeva.

Rok za provođenje postupka iz stava 1. i 2. ovog člana je trideset (30) dana od dana prijema uredno dokumentiranog zahtjeva.

#### **Član 9.**

Upisom u Registar medicinskih sestara-tehničara Zeničko-dobojskog kantona i izdavanjem licence, medicinska sestra-tehničara stiče prava i obaveze zajamčene Statutom Komore medicinskih sestara-tehničara Zeničko-dobojskog kantona.

Danom upisa u Registar medicinskih sestara-tehničara Zeničko-dobojskog kantona, Komora će članu izdati licencu i člansku iskaznicu.

Upisom u Registar, medicinska sestra-tehničara, član stiče i obavezu plaćanja članarine Komori medicinskih sestara-tehničara Zeničko-dobojskog kantona.

#### **Član 10.**

Medicinske sestre-tehničari su dužni, pravovremeno, obavještavati Komoru o svim nastalim promjenama u podacima koji se upisuju u Registar medicinskih sestara-tehničara Zeničko-dobojskog kantona i koji su od uticaja na izdatu licencu.

### **IV IZVADCI I POTVRDE**

#### **Član 11.**

Komora na osnovu evidencije iz Registra medicinskih sestara-tehničara Zeničko-dobojskog kantona izdaje slijedeće:

- 1) potvrde o članstvu u Komori medicinskih sestara-tehničara Zeničko-dobojskog kantona;
- 2) potvrde o poštivanju etičkih principa struke, odnosno da se protiv podnosioca zahtjeva ne vodi disciplinski postupak;
- 3) potvrde o izmirenim obavezama na ime članarine u Komori.

Potvrde iz stave 1. alineje 1, 2 i 3. ovog člana predstavljaju javne isprave i izdaju se na jednom od jezika koji su u službenoj upotrebi u Bosni i Hercegovini.

### **V OBLIK I SADRŽAJ ISKAZNICE**

#### **Član 12.**

Komora medicinskih sestara-tehničara Zeničko-dobojskog kantona, danom upisa u Registar, medicinskoj sestri-tehničaru će izdati i člansku iskaznicu.

#### **Član 13.**

Članska iskaznica obavezno sadrži slijedeće podatke:

- 1) naziv, znak i sjedište komore koja je izdala iskaznicu;

- 2) ime i prezime medicinske sestre-tehničara;
- 4) registarski broj;
- 5) fotografiju medicinske sestre-tehničara.

#### **Član 14.**

Članska iskaznica može da sadrži i slijedeće podatke:

- 1) naznaku stručnog naziva,
- 2) rok važnosti iskaznice;
- 3) naznaku da je iskaznica vlasništvo izdavaoca, odnosno komore i da na zahtjev mora biti vraćena;
- 4) ostale podatke, u skladu sa Statutom i drugim aktima Komore.

#### **Član 15.**

Medicinska sestra-tehničar je dužna gubitak članske iskaznice odmah prijaviti izdavaocu, odnosno komori čiji je član.

Komora medicinskih sestara-tehničara Zeničko-dobojskog kantona će provesti postupak oglašavanja iskaznice nevažećom te medicinskoj sestri-tehničaru izdati novu člansku iskaznicu.

Rok za provođenje postupka iz stava 2. ovog člana je 30 (trideset) dana.

### **VI ISPIS IZ REGISTRA**

#### **Član 16.**

Komora medicinskih sestara-tehničara Zeničko-dobojskog kantona, izvršit će ispis iz Registra u slijedećim slučajevima:

- 1) na zahtjev medicinske sestre-tehničara;
- 2) prestankom članstva medicinske sestre-tehničara u Komori;
- 3) na zahtjev Suda Komore;
- 4) zbog neplaćanja članarine,
- 5) zbog oduzimanja licence.


### **VI PRELAZNE I ZAVRŠNE ODREDBE**

#### **Član 17.**

Ovaj Pravilnik stupa na snagu osmog (8) dana od dana usvajanja na Skupštini Komore medicinskih sestara-tehničara Zeničko-dobojskog kantona.

Ovaj Pravilnik će biti objavljen na web stranici Komore medicinskih sestara-tehničara Zeničko-dobojskog kantona. [www.komzedo.ba](http://www.komzedo.ba).

**Predsjedavajući Skupštine Komore**



Poljac Jug, dipl.med teh



Broj: 01-19/20

Datum: 11.09.2020